

Jan 2020



UNIVERSITI
TEKNOLOGI
MARA

79

th
ISSUE

info kampus

UITM SARAWAK BULLETIN



PENGANUGERAHAN STATUS AKREDITASI PENUH (MQA02) BAGI PROGRAM DIPLOMA AKUAKULTUR (AT117)

Oleh: Nur Ain Abu Bakar

Pada 9 dan 10 Oktober 2019 yang lalu, Fakulti Perladangan dan Agroteknologi UiTM Cawangan Sarawak Kampus Mukah telah menerima kunjungan Unit Hal Ehwal Akademik (UHEK), Dekan Fakulti dan delegasi auditor lantikan "Internal Quality Assurance" (IQA) bagi tujuan semakan dan penganugerahan status akreditasi program Diploma Akuakultur (AT117). Kunjungan delegasi luar ini telah disambut mesra oleh Ketua Unit Kualiti UiTM Cawangan Sarawak, Encik Yussri Sawani dan Ketua Pusat Pengajian Perladangan dan Agroteknologi, Encik Muhammad Syukrie Abu Talip dan barisan pensyarah yang terlibat dalam proses dokumentasi.

Program Diploma Akuakultur ini telah mula dijalankan di UiTM Cawangan Sarawak Kampus Mukah dari September 2017 sejajar dengan aspirasi pendidikan nasional untuk melahirkan modal insan yang cemerlang dan berkualiti. Program yang telah diilhamkan seawal tahun 2010 ini, merupakan salah satu hasil daripada penumpuan Rancangan Malaysia ke 10 (RMK10) yang menggariskan keutamaan nasional dalam pembangunan sektor pertanian dan penghasilan sumber makanan yang mampan. Program ini telah mendapat status akreditasi sementara (MQA01) pada tahun 2012 dan pada 18 November 2019, selepas lawatan tapak dan audit dijalankan, program ini telah dianugerahkan status akreditasi penuh (MQA02).

Seramai 8 orang pensyarah telah terlibat dalam usaha pengumpulan dan penjiilidan laporan program bagi tujuan akreditasi. Pelaporan MQA02 ini turut melibatkan kerjasama agensi luar (pemegang taruh), agensi perikanan, institusi luar serta usahasama universiti dan institusi pendidikan tinggi sekitar Sarawak. Semoga dengan penganugerahan status akreditasi ini, program ini dapat menghasilkan modal insan yang cemerlang yang dapat memacu perkembangan sektor perikanan dalam negara.



PERTANDINGAN KLIP VIDEO: MEMPERKENALKAN BUKU MANDARIN

Oleh: Ting Hie Ling



Pertandingan Klip Video: Memperkenalkan Buku Mandarin merupakan aktiviti yang dianjurkan oleh Persatuan Alumni Graduan China Sarawak sempena Kempen Membaca. Tujuan pertandingan ini adalah untuk menggalakkan budaya membaca di kalangan masyarakat. Pertandingan ini diadakan dari 23 April sehingga 20 Julai 2019 dan turut disertai oleh 200 orang pelajar sekolah rendah, menengah serta orang awam. Saudari Radika Seniorita Kinta Anak Franco dari Program BA111 telah memenangi tempat ketiga dalam pertandingan ini. Beliau dijemput untuk menghadiri majlis penyampaian hadiah di Pusat Persatuan Alumni Graduan China Sarawak pada 27 November 2019. Majlis penyampaian hadiah tersebut telah disempurnakan oleh YB Datuk Tiong Thai King, Pengerusi Majlis Perbandaran Sibu. Tahniah dan syabas diucapkan kepada saudari Radika Seniorita Kinta Anak Franco.

Audit Dalaman 5S/EKSA UiTM Cawangan Sarawak Kampus Mukah 2019

Oleh: Imelia Laura Daneil, Siti Faridah Kamaruddin, PM Dr. Tang Howe Eng

Jawatankuasa Audit Dalaman 5S/EKSA UiTM Cawangan Sarawak Kampus Mukah telah mengadakan Audit Dalaman 5S/EKSA pada 3 September hingga 6 September 2019. Zon-zon yang terlibat dalam proses pengauditan ialah Zon Setia Raja, PTAR, HEP, HEA, Fasiliti, Pengurusan Ladang, ACIS, Pejabat Kolej, dan ketiga-tiga fakulti merangkumi Fakulti Pengurusan Perniagaan, Fakulti Sains Gunaan dan Fakulti Perladangan dan Agroteknologi. Hasil Audit Dalaman 5S/EKSA akan menentukan pemenang zon terbaik bagi tahun 2019 dan penemuan audit dalaman ini akan dimaklumkan kepada ketua zon bagi tujuan penambahbaikan. Amalan 5S/EKSA di Kampus Mukah diharap dapat membentuk budaya kerja yang kemas dan sistematik demi mutu kualiti kerja yang lebih baik.





UNIVERSITI
TEKNOLOGI
MARA

Corporate Communications Unit

Universiti Teknologi MARA Cawangan Sarawak
Blok Pentadbiran, Kampus Samarahan 2
Jalan Datuk Mohd Musa
94300 Kota Samarahan
Sarawak, Malaysia

Tel: 082 - 678 130 | Fax: 082 - 678 110

E-mail: corporate@uitm.edu.my

www.sarawak.uitm.edu.my

ISSN 2232-1578

